



Här Claude Wiseler
President vun der Chamber
Lëtzebuerg, de 13. Februar 2025

Här President,

Esou wéi den Artikel 80 vum Chambersreglement et virgesäit, bieden ech lech, dës parlamentaresch Fro un d'Madamm Justizministesch weiderzeleeden.

An de leschte Joren ass den Online-Hatespeech zu engem ëmmer méi grouse Problem ginn, souwuel an eiser Gesellschaft wéi och an der politescher Debatt. D'Verbreedung vu verbaler Gewalt, diskriminéierende Bemierkungen a Bedroungen op sozialen Netzwierker an aneren Online-Plattformen huet net nëmme gravéierend Konsequenze fir déi betraffe Persounen, mee och fir d'Zesummeliewen an eis demokratesch Wäerter.

Och zu Lëtzebuerg gesi mir ëmmer méi Beispiller vun diffaméierenden oder haasserfëllte Kommentaren, déi géint spezifesche Gruppen oder Individue geriicht sinn. Trotz de gesetzleche Bestëmmungen, déi schonn existéieren, bleift d'Fro, ob déi aktuell Instrumenter effektiv genuch sinn, fir dëst Phänomen an de Grëff ze kréien.

An deem Kontext wéilt ech folgend Froen un d'Madamm Justizministesch stellen:

- Wéivill Virfäll sinn an denen läschte Joer um Site Stoplevelu gemëllt ginn?
- Wéivill Plainten sinn an denen läschte Joer am Kader vum Hatespeech gemaach ginn? An wéivillen Fäll kouw et zu enger Verurteilung?
- Wéi eng Kampagnen geséit d'Madamm Justizministesch vir fir géint den Hatespeech virzegoen?

Här President, ech bieden lech dës Froen, mat mengem déifste Respekt unzehuelen.

Françoise Kemp

Députéiert



Äntwert vun der Justizministesch, Elisabeth MARGUE, Ministesch fir Gläichstellung a Diversitéit, Yuriko BACKES, Minister fir Educatioun, Kanner a Jugend, Claude MEISCH an dem Minister fir Famill, Solidaritéit, Zesummeliewen an Accueil, Max HAHN op d'parlamentaresch Fro N°1934 vum 13. Februar 2025 vun der Madamm Deputéiert Françoise KEMP.

Wéivill Virfäll sinn an denen läschte Joer um Site Stopline.lu gemëllt ginn?

Den Internetsite BEE SECURE Stopline, erlaabt et jidderengem illegal Inhalter um Internet anonym a confidentiel ze mellen. Ënner illegalen Inhalter, déi een op dëser Internetsäit melle kann, versteet een:

- Inhalter am Zesammenhang mat sexuellen Iwwergrëffer op Mannerjäreger;
- Rassistesesch, revisionistesesch, diskriminatoresch Inhalter an Haassried;
- Inhalter terroristescher Natur.

De BEE SECURE Stopline Service gëtt bedriwwen vu KJT (Kanner-Jugendtelefon), dee Member ass vum internationalen INHOPE Réseau (International Association of Internet Hotlines).

D'Signalementer ginn an Zesummenaarbecht mat den Autoritéiten an de kompetente Partner op nationalem an internationalem Niveau traitéiert.

Online Hatespeech kann ënner zwou verschidde Kategorien falen:

- Rassismus an Diskriminéierung:
 - o 2023: sinn 319 URL via BEE SECURE Stopline gemëllt ginn, dovu sinn der 200 un déi zoustänneg Autoritéit weidergeleet ginn;
 - o 2024: sinn 448 URL via BEE SECURE Stopline gemëllt ginn, dovu sinn der 263 un déi zoustänneg Autoritéit weidergeleet ginn.

Déi signaléiert Contenen hu folgend Themeberäicher betraff: Opruff zu Haass oder zur Gewalt opgrond vun enger Charakteristik wéi der Nationalitéit, der Ethnie, der reliéiser Zougehéieregkeet, dem Geschlecht, der sexueller Orientéierung, oder och generell der Hierkonft.

- Terrorismus:
 - o 2023: sinn 41 URL bei der BEE SECURE Stopline an deem Domaine signaléiert ginn, dovu sinn der 25 un déi zoustänneg Autoritéit weidergeleet ginn;
 - o 2024: sinn 127 URL bei der BEE SECURE Stopline an deem Domaine signaléiert ginn, dovu sinn der 89 un déi zoustänneg Autoritéit weidergeleet ginn.



Déi Signalementen, déi zeréckbehale goufen, betreffe virrangeg Inhalter, déi zu Gewalt oder anere kriminellen Akte géint spezifesch Gruppen (reliéis Communautéiten, politesch Responsabel) incitéieren, respektiv Contenuen, déi dës Akten verherrlechen.

D'Differenz tëscht de signaléierten URL an deenen, déi un d'Autoritéite weidergeleet goufen, erkläert sech duerch verschidde Facteuren, wéi ënnert anerem:

- De Contenu ass net méi online;
- De Contenu ass scho gemellt ginn;
- D'Service Providere vun de Plattformen hunn de Contenu selwer identifizéiert a suppriméiert;
- Den Inhalt fält kloer net ënnert dat, wat d'Gesetzestexter am Zesammenhang mat der Kategorie rassistesesch, revisionistesesch, diskriminatoresch Inhalter an Haassried reegelen (Artikel 454 bis 457-1 vum Code pénal).

Wéivill Plainten sinn an denen läschte Joer am Kader vum Hatespeech gemaach ginn? An wéivillen Fäll koum et zu enger Verurteilung?

Follgend nei Affäre si wéinst Verdacht op eng Strofdot geméiss Artikel 457-1 vum Code pénal enregistréiert ginn.

(Doublone si méiglech, wann ee vun den zwee Parqueten eng Affär un den anere Parquet "pour raison de compétence territoriale" weidergëtt):

Joer	Parquet Lëtzebuerg	Parquet Dikrech	Total
2020	147	13	160
2021	161	7	168
2022	50	5	55
2023	99	1	100
2024	40	5	45



Et goufen folgend geriichtlech Decisiounen an der Matière geholl:

Unzuel vu geriichtlechen Decisiounen (Art. 457-1 vum Code pénal)*

	2020	2021	2022	2023	2024
Diekirch (Total)	0	2	2	1	0
Jugement	0	2	1	1	0
<i>Acquitté</i>	0	1	0	0	0
<i>Condamné</i>	0	1	1	1	0
Arrêt définitif	0	0	1	0	0
<i>Condamné</i>	0	0	1	0	0
Luxembourg (Total)	11	17	21	24	15
Ordonnance pénale	0	0	0	1	1
<i>Condamné</i>	0	0	0	1	1
Jugement	11	15	19	16	6
<i>Acquitté</i>	1	1	2	3	2
<i>Condamné</i>	10	14	17	13	4
Arrêt définitif	0	2	2	7	8
<i>Condamné</i>	0	2	2	7	8
Total (Luxembourg et Diekirch)	11	19	23	25	15

*par date de décision (OP, jugement ou arrêt).

Et ass ze bemierken, datt d'Parqueten eng alternativ Moosnam zu de Poursuite proposéiere kënnen, wéi zum Beispill ee Rappel un d'Gesetzgebung oder eng Invitatioun fir um Programm "Dialog statt Hass", dee vun der Associatioun Respect.lu organiséiert gëtt, deelzehuelen.



Wéi eng Kampagnen geséit d'Madamm Juszministesch vir fir géint den Hatespeechvirzegoen?

De Kampf géint all Form vun Haassried ass eng wichteg Prioritéit, déi d'Regierung duerch verschidde Moosnamen och national ëmsetzt.

2017 huet d'Regierung eng Ulafstell agefouert, déi eng Berodung a Begleedung vu Persounen ubitt, déi vun Extremismus a Radikalisatioun betraff sinn. Et handelt sech dobäi em d'ASBL SOS Radicalisation, déi am Mee 2017 gegrënnt gouf, a säit Juli 2017 ass den dozou gehéierende Präventiouns- a Berodungsservice „Respect.lu – Centre contre la radicalisation“ funktionell. De Service bitt Leit, déi op iergendeng Manéier mat Extremismus a Radikaliséierung konfrontéiert sinn, een oppent Ouer an Ënnerstëtzung un, an organiséiert och Formatiounen a Sensibiliséierungsaktivitéiten.

Well den Opruff zum Haass an eiser Gesellschaft, besonnesch iwwert déi sozial Medien, ëmmer méi zu engem Problem ginn ass, huet Respect.lu 2020 de Projet „Dialog statt Hass“ lancéiert. De Fokus läit bei dësem Projet op Persounen, déi duerch hiren „Hate Speech“ am Internet opfälleg gi sinn, an doduerch an der Reegel vum Parquet opgefuerdert ginn, dee Programm ze suivéieren. D'Zil ass et, zesumme mam Auteur vum „Hate Speech“ eng Analyse vun der Dot ze maachen, eng Selbstreflexioun ze initiéieren, méiglech Ursachen ze analyséieren an ee méi respektvollen Ëmgang mat anere Leit ze erreechen. 2024 ass och ee Posten „streetworker en ligne“ geschaaft ginn, fir d'Interventiounen vu Respect.lu am digitale Raum ze verstärken.

Am Schouljoer 2022-2023 huet BEE SECURE d'Sensibiliséierungscampagne #NOHATEONLINE lancéiert gehat, fir e respektvollen Ëmgang um Internet ze fërderen an Hate Speech entgéintzewierken. D'Portal nohateonline.lu bitt Recommendatiounen géint Online-Haass a weist och direkt op d'Funktioon vun der BEE SECURE Stoptline hin. Op der Websäit fënnt een och d'Quiz "Däerf een dat soen?", wou d'Notzer d'Grenze vun der Meenungsfräiheet teste kënnen. Dës Campagne ass och als Reaktioun dorop ze gesinn, dass ëmmer méi Meldungen am Beräich Rassismus, Revisionismus, Diskriminéierung an Terrorismus festgestallt ginn.

An der Folleg vun den Diskussiounen ronderëm d'Petitiounen 3198 an 3281 huet d'Gläichstellungsministesch den 22. November 2024 verschidden Acteuren zesummegeruff, déi sech elo schonn géint Haassried engagéieren (Police Grand-Ducale, Parquet Lëtzebuerg, Respect.lu, Rosa Lëtzebuerg, Centre CIGALE, Intersex & Transgender Luxembourg Asbl, Kanner Jugend Telefon, Bee Secure). Bei dësem Echange ass et drëms gaange Pisten auszeschaffen, wéi ee méi geziilt aktiv géint de Phänomen vun der Haassried ka virgoen. Eng vun de Conclusiounen ass et, fir dës Acteure méi an de Vierdergrond ze setzen a verstärkt op déi bestoend Servicer an déi gesetzlech Dispositiounen, déi Haassried inkriminéieren, hinzewiesen.

Doriwwer eraus ass de Ministère fir Gläichstellung an Diversitéit (MEGA) amgaangen e Projet op d'Been ze stelle mam Centre contre la Radicalisation Respect.lu iwwert de Sujet "Zivilcourage am Netz", wou et drëms geet, fir op den digitale Plattformen zivilgesellschaftlecht Engagement ze stärken an e positive Géigennarrativ zu der Haassried ze formuléieren.

Besonnesch déi Minoritéiten an eiser Gesellschaft déi zur Zilscheif vun Haassried geroden, sollen doranner bestärkt ginn sech konstruktiv a respektvoll ze wieren, sech fir eng gläichberechtegt



Gesellschaft anzesetzen a fir e Bäitrag ze leeschten, déi sozial Plattformen erëm zu deem ze maachen wat se mol waren : e Forum fir ee demokrateschen Austausch a fräi Meenungsäusserung am Respekt par rapport zu jidderengem.

Doriwwer eraus schafft de MEGA zesumme mat aner Ministèren un zwee wichtegen Nationalen Aktiounspläng. Den Nationalen Aktiounsplang iwwer geschlechtsbaséiert Gewalt wäert ënnert anerem och en Akzent op déi sougenannten digital Gewalt (“tech-facilitated Violence”) leeën a wäert och de Projet “Zivilcourage im Netz” integréieren. Den Nationalen Aktiounsplang fir Persounen déi den LGBTIQ+ Communautéiten ugehéiere wäert de Sujet vun der Haassried géint dës Communautéite verstärkt an de Fokus huele mat Mesuren a konkrete Projeten. Béid National Aktiounspläng wäerten am Summer 2025 virleien.

Lëtzebuerg, den 15. Abrëll 2025.

D’Justizministesch

(s.) Elisabeth Margue